


Sein noch ein andre Schneckenlini macht man aus eynem rechten zirkeltrif / die auch die Steynmeß zu den stigen gebrauchten / sie wirdet aber billicher eyn schrauffen lini genant / doch man nen sie wie man will so ist es eyn nütze Lini / darumb wil ich sie hinach auch leren machen / vnd wer suchen mill der mag vil darauff finden / Reiß erstlich eyn runden riß wie vor angezeygt aus eym Centro .a. den theyl mit eynere auffrechten Lini / durch den Centrum .a. in zwey gleiche theyl vnd setz oben da der zirkeltrif gerürt wirdet .12. vnd vnden .6. darnach far aus dem puncten .12. mit eynere geraden Lini vbersich / so ferr du der bedarfft / der ende sey oben .a. Darnach schneyd dise auffrechte Lini vnden nahent bey dem grund des zirkeltrif mit eynere zwerchlini .c.d. zu gleichen winkeln ab / der ende sey .b. Darnach theyl den grund der zirkellini mit puncten in .12. gleyche theyl / vnd setz ir zall darzu / vnd heb zu nechst bey der seitten .12. an zu zelen .1.2.3.4. bis du wider kombst zu zwölffen / aber darnach muß die zall fort lauffen / vnd so weyt du der bedarfft auff eynander gestelt werden / also kumbt zum ersten .13. auff eyns .14. auff 2.2c. Also mag man die zall / drey / vier / fünff mal vnd so oft man will ober eynander zihen vnd führen nach dem man eyn Schnecken hoch machen will / So nun diser grundt zugericht ist / als dann punctir die auffrechte Lini .a.b. so in vill theyll als du wilt / vnd setz die ziffer darzu / vnd heb an bey ende des .b. vbersich zu zelen / 1/2 / 3 / 4 / 2c. Darnach far aus dem puncten des grundes .1. aus der zirkellini vbersich durch die zwerchlini .c.d. darnach far aus der auffrechten lini .a.b. von dem puncten .1. mit einer zwerchlini gegen der auffrechten die aus dem grundt des puncten .1. vbersich gezogen ist / Wo dann dise ein eck schliessen da setz auch ein puncten .1. also thue im durch die ganz zall des grundes vnd der auffzogen linien .a.b. durch alle puncten / auch in der oberlauffung der zall als hoch du steygen wilt / So nun die schneckenlini allenthalben also punctirt ist / als dann zeuch die Schneckenlini von der hand dareyn / wie ich dann das hinach hab auffgerissen / Item die schneckenlini mögen auch von punct zu puncte ecket gezogen werden / Man mag auch eyn solchen schnecken zwisach machen in seinem gang / Erstlich macht man die spindel im Schnecken gerad vnd ganz / So mag man sie auch holl machen / oder gewunden / also das man von oben dar durch bis auff den grund siche / wie dann die Steynmeßen das in irem auffreissen sollen wissen zu machen / vnd durch verrückung der grundbretter in das werck zihen / Item aus diser vorgemelten lini macht man schrauffen von eym / zweyen / oder dreyen / oder vier gengen 2c. damit man so schwer vnd stark ding mag heben vnd brechen das sich des zäuerwundern ist.



Dis ist der vor
 beschriben sch
 neck vnd sein
 grund.